



Aalkoe-rohkelassh

Klahke-liturge jallh abpe åålmege aalkoe-rohkelassem rohkele. Gosse sådtoe-boejhkesjimmie aalkoe-rohkelassine aktine, dellie klahke-liturge aalkoe-rohkelassem rohkele, jìh åålmege sådtoe-boejhkesjimmie rohkele.

1

KL | Jupmele, dov aejlies gåatan libie tjaangeme dåastoehdih dam maam datne sijnth mijjese vedtedh.

Rìhpesth mijjen vaajmojde
guktie mijjen jaahkoe dutnjien orrestávva.

2.

KL | Aejlies Jupmele, dov ååredæjjan uvte libie tjåanghenamme dov geriesvoetem jìh saetniesvoetem dåastoehdih.

Raajh dov Voejkenem mijjese, jìh rìhpesth mijjen vaajmojde guktie dåastoehdibie dam maam datne mijjese vadtah. Baajh dov baakoem mijjen vaajmojde sjìdtedh guktie Kristuse mijjesne jeala, jìh mijjeh datnine aktanibie jìh datnem gaajhkine dïenesjibie.

3.

KL | Buerie Jupmele, datne guhte hïegkem gaajhkide vadtene mah jielieh, datnem heevehtibie eatnemen tjaebpiesvoeten åvteste jìh gaajhki åvteste mah vuesiehtieh datne boerehke.

Dov ååredæjjan uvte rohkelibie: Rìhpesth mijjen bieljide guktie goltelibie gosse soptsesth. Vedtieh mijjese vaajmoeh mah datnem gjìhtieh dov buerievoeten åvteste. Jìh vedtieh njoektjemh jìh gieth mah dov åavtoej bijre vïhnesjieh.

4.

KL | Jupmele, dov aejlies gåatan tjaangeme dåastoehdih dam maam datne Jupmele Aehtjie, mov sjugniedæjja, datne Åejvie Jeesuse, mov lutniestæjja, datne Aejlies Voejkene, mov soelkedæjja jieliemisnie jìh jaemiemisnie, sijnth munnjien vedtedh.

Rìhpesth mov vaajmoem dov Aejlies Voejkeninie guktie mov sådtoej gielhtie sorkem jìh dov aarmose vaetestem jìh fierhten biejjien dov aejlies åålmeginie aktine saetnies jìh aejlies jieliemasse orrestovvem.

5.

KL | Jupmele, daesnie Leah.

G | **Jupmele, daesnie Leah.**

KL | Datne mijjem faerhmesth.

G | **Datne mijjem faerhmesth.**

KL | Steerh mijjem gieteste.

G | **Steerh mijjem gieteste.**

6.

Gosse daam rohklassessem rohkelibie, dellie sådtojde aaj boejhkesjibie. Dan gielhtie maehetebe sådtoe-boejhkesjimmiem (5 Sådtoe-boejhkesjimmie) gervedh.

Liturge, klahkeliturge j'ih åålmege rohklassessem laavloeh.

L | Gaerteles Jupmele, datne orre hiegkem mijjese vadtah gosse lååvkesovvebe. Aejlies laavkoemisnie kroessine mïerhkelgibie dov maanine årrodh.

KL | Dov maanah libie. Orresth daan biejjien mijjen jaahkoem j'ih mijjen gieresvoetem.

Liturge tjaetsiem golmen aejkien gååjve goh laavkoemisnie.

L | Jupmele, dov dååjvehtassh tjuevkieh guktie aatjan gïerese tjuavka – datne dåajvohtamme j'ih mijjine sjiehtedamme –

KL | Dov gåajkoe mijjen gyjhtelassine j'ih laavloeminie båetebe.

Åå | **Dov gåajkoe mijjen gyjhtelassine j'ih laavloeminie båetebe.**

KL | Datne mijjen håhkie.

Åå | **Datne mijjen håhkie.**

L | Datne mijjen biejjide damth. Datne gaajhkem daajrah.

KL | Dov syjhtedem j'ih dov stillemidie libie meadteme.

Åå | **Dov syjhtedem j'ih dov stillemidie libie meadteme.**

KL | Jupmele, gïerth mijjem.

Åå | **Jupmele, gïerth mijjem.**

L | Datne Jeesusem kroepsteste lutnjestih.

Gosse lååvkesovvebe, dellie orre jieliemasse lutnjestovvebe Jeesusinie aktine.

KL | Jupmele, dov dååjvehtassh tjuevkieh goh aatjan gïerese tjuavka.

Åå | **Jupmele, dov dååjvehtassh tjuevkieh goh aatjan gïerese tjuavka**

KL | – datne dåarjvohtamme j'ih mijjine sjiehtedamme.

Åå | – **datne dåarjvohtamme j'ih mijjine sjiehtedamme.**

7.

Gosse jijnjh maanah gyrrkesjeminie, daate rohkelasse sjeahta.
Måedtie maanah maehtieh åålmegeen uvte tjåadtjodh jñh vuesiehtidh guktie åålmege aaj
maahta darjodh.

Gïetide lutnjestibie

KL/L | Gieries Jupmele, datne mijjen luvnie.
Årroeh mijjen tjoevke.

Gïetide kroessehtahkine mielken uvte steerebe

KL/L | Gieries Jeesuse, datne mijjine aktine vaadtsah. Baajh mijjem dov
raeffesne jielehdh.

*Gïete-låapojde sinsitniem vööste jñh soermide bæjjese, mielken uvte
steerebe*

KL/L | Gieries Jupmele, datnem mijjem vuajnah.
Dåastohth mijjen åssjalommesh jñh rohkelassh.

Gïetide geelkedh jñh gïete-låapojde bæjjese

KL/L | Gieries Jeesuse, datne mijjen gïeth vaaltah dov gïeten sïjse.
Vuesehth dov buerie baalkam.

Lihkesadtjem gïeteste steeredh

KL/L | Buerie Aejlies Voejkene, datnem gijhtebe juktie datne mijjine
aktine. Viehkehth mijjem sinsitniem gieriesvoetine vuartasjidh.

8.

KL | Aejlies Jupmele, datne gie mijjese hïegkem vadteme:
Datnem gijhtebe juktie mijjem dåastohth gosse lååvkesovvimh
jñh mijjem aejlies maalestahkine nænnosth.
Vaedtsehth mijjem dov aejlies baakojne jñh vuesehth mijjese
maam sijnth edtjebe darjodh.

9.

Gærhkoe-jaepien sjïere rohkelassh aalkoe-rohkelassine.

Adveente

Jeesus Kristusem vuertebe.
Båata jemhkelen faamojde håajhtodh.

(1)

Jupmele, dov aejlies gåatan libie tjaangeme dåastoehtidh dam maam datne sïjhth vedtedh.

Jeesus Kristusem vuertebe.

Båata jemhkelen faamojde håajhtodh. Rohkelibie:

Rihpesth mijjen vaajmojde,

guktie mijjen jaahkoe dutnjien orrestávva.

(2)

Aejlies Jupmele, dov ååredæjjan uvte libie tjåanghkenamme dov geriesvoetem jïh saetniesvoetem dåastoehtidh.

Jeesus Kristusem vuertebe.

Båata jemhkelen faamojde håajhtodh.

Rohkelibie: Seedth dov Voejkenem mijjen gåajkoe

guktie dåastoehtibie dam maam datne sïjhth mijjese vedtedh.

Baajh dov baakoem mijjen vaajmose sjïdtedh

guktie Kristuse mijjine jeala, jïh mijjieh datnine aktanibie jïh datnem

iktesth dienesjibie.

Jåvle-biejjieh

Stroehte-iehkede

Datne maanam gie kråbposne vealan, dan jïjjen vedtih gosse eengkelh gorredimmien jïh ræffien bijre laavloejin.

Jåvle-biejjie

Datne baajih Baakoem almetjinie sjïdtedh jïh mijjen luvnie årrodh gosse

Kristuse, mijjen Lutniestæjja, reakadi.

Orrejaepien biejjie

Datne gorredimmien jïh ræffiem vadtah Jeesusen nommine, jïh datne orrejaepiem mijjine aktine vaadtsah.

Dååjrehtimmie-biejjieh

Kristuse dov hearlohkevoetem vuesehte.

Jeesuse veartenen tjoevke mij gaajhkide åålmegidie tjuavka.

Faastoe

Dåeriedimmie

Datne mijjem stillh Jeesusem dåeriedidh,

Jeesusem, gie gaajhkem mij altese lij, hiejhtieji datnem dienesjidh.

Vaejvie

*Datne mijjese Jeesusem vedtiejih mijjem gorredidh jih raeffiem vedtedh.
Altese jaememe hiegekem jih mijjen sådtoej luejhtiemassem vadta.*

Maarjan biejjie

*Datne reerijidie åajvemes tjaahkes-sijjeste jurrieldih jih viesjies almetjidie
lutjestih. Datnem gijhtebe Maarjan åvteste gie veartenen gorredæjjam
baersieldi.*

Påaske-biejje

Datne Jeesusem kroepteste lutnjestih jih jaemedden faamoem håajhtoejih.

Kristusen elmievoelkove-biejje

*Datne dov baerniem, Jeesus Kristusene, bijjiedih jih altemse dov åelkies
gieten bealan tjihkehtih.*

Pængste-biejje

*Datne dälle-gomtjelh learohki aatsolen seedtih jih learoehkidie dov
Voejkeninie dievhtiejih.*

Golmelaaketje-biejje – siejme

*Datne dov rijhkem Jeesus Kristusenie vadteme,
jih mijjem dov Voejkeninie stillh jaehkedh jih dienesjidh.*

Sjugniedimmien biejjie

*Datne dov Voejkenem seedtih jih dellie jieleme sjugniedovvi.
Datne eatnemem orrestahtah, jih mijjem buerie vadtesigujmie gillehth.*

Åvlh-såhkoeh

*Datne dov dijre-guedtjidie stillih
kroesse-væhtam mijjese tseegkedh.
Datne baajh faamoem våajnedh mij viesjiesvoetine illesåvva.*

Saangerdimmiej jih rohkelassi biejjie

*Datne mijjen sådtojde mijjeste luajhtah
jih mijjem stillh fierhten biejjien dov gåajkoe jarkelidh.*

Aejlieskoddji mæssoe

*Datnem gijhtebe dej åvteste gieh buerie-ræjhtoem rijhtestalleme,
roehdedimmiem galhkeme jih jaahkoem vaarjelamme.
Dov luvnie mijjen ihkuve ulmie.*

Aejlieskoddji mæssoe / Mojhtese-biejje / Gærhkoe-jaepien minngemes

aejlege

Datne voestes leah jïh minngemes leah.

Dov aarmoe lea mijjen håhkoe jïh mijjen soelkehtasse.

Skylleme-biejje

Datne mijjem laavkoemisnie dåastohth

jïh fierhten biejjien mijjine aktine leah.

Saemiej åålmegebiejje jïh suehpeden 17. biejje

Datne veartenen gaajhkide åålmegidie stilleme aktine årrodh jïh raeffesne jïh rïektesvoetesne jjeledh.

Rïektesvoeten jïh raeffien biejje / Njoktjen 8. biejje / Suehpeden voestes biejje.

Datne gaajhkide almetjidie dov guelmien mietie sjugniedamme

jïh mijjem stillh almetjen vyörtegsvoetem vaarjelidh.

10.

Guktie aalkoe-rohkelassh maehtieh ovmesse lehkesne årrodh

(Vuartesjh aalhtere-gærjam Nöörjen gieline)

11.

Aalkoe-rohkelasse gosse neavroe

Gosse neavroe jallh ovlæhkoe tjïeltesne, nasjovnesne jallh veartanisnie jïh åålmege dam govleme, dellie sjeahta neavroen bijre soptsestidh jïh gyrhkesjimmien aalkovisnie rohkelidh.

Gosse ajve såemies neavrosne leah, dellie buerebe sjeahta dej åvteste rohkelidh gosse åålmege gærhkoen rohkelasse lohkesåvva.

Akte jallh jeenebh baakoeh Bijpelistie maehtieh lohkesovvedh. Vuesiehtimmien gaavhtan: Saalm 130, 1–2; Saalm 38, 22–23; Saalm 44, 25–27; Saalm 10,1; 12b; 14.

Gosse Bijpelelistie lohkesåvva, dellie liturge maahta naemhtie aelkedh:

L | Ibie maehtieh tjïelkedh dam maam ibie guarkah. Bijpielisnie maehete baakoeh gaavnedh mijjen aejvierdimnese jïh rohkelasside.

Rohkelassen mænngan, sjeahta sjeavohth årrodh gosse daejtie baakojde jeahteme:

L | Sjeavohth libie gosse ussjedibie jïh rohkelibie.

Dellie Kyrije eelesån sjeahta.